



北國雪聲

佇冬尾天去到日本茅野市參加教育交流活動。一落飛行機，北國冬天的冷風，隨一港一港吹來，若親像針咧搥，寒甲予人強欲擋袂牢！這種冷，會予人數念咱南國清涼的微微仔風。是講，這款的寒，才是正港的北國氣氛，是一種恰咱南國無仝，嘛完全毋捌感受過的寒天的氣味！

蹣佇飯店的第一暝，天公伯仔就搬一齣戲予阮看矣——落大雪囉！落雪恰落雨無仝，竟然是無聲無說。我干焦聽著阮這陣亞熱帶臺灣來的旅客咧大細聲咻——「落雪矣！落雪矣！」「逐家緊來看喔！」

雪，伊用六角形優美的姿勢，一片一片落佇我的頭殼頂。我展開雙手，予雪落佇我的手蹄仔，予雪落佇我擔頭看對天頂去的額頭；雪，伊也輕 báng-báng、軟軟，落佇我的胸坎，堅凍，才閣印入我的心內，這是我人生的第一場雪！

隔轉工，我趁下晡歇暍的時，家己一个人行去飯店後壁的小山崙。路無蓋崎，我綴車路一直行去較懸的所在，路面攏是昨暗猶未溶去的雪。路邊較平坦的所在，有一間一間的人家厝。毋過，哪會攏無人出出入入咧？後來我才知影，遮是別莊區，逐个人攏來遮歇熱較濟，寒天時仔罕得有人來！

行佇這條「雪路」，真正一个人影都無。向四面看過去，雪，四箍輾轉攏是雪！我去予一大片全然白色的雪景包圍咧。我查查仔行佇無聲的雪地當中，好親像一尾熱帶魚，覷佇一片白鑠鑠的海水裡，四箍圍仔攏無聲，恬甯甯、恬甯甯！有一目矚的時間，我沉醉佇這片景緻當中。我迷失，我失去語言，毋知影愛用啥物話語來形容現此時的心境！忽然間，樹仔頂一隻烏鴉的叫聲「ah！」雄雄共我摸轉來現實，將我抽離開這場無聲的雪景。佇這個時陣，我才願意相信，原來世間上，真正是有遮爾嬌的景緻！

佇北國拄著人生的第一場雪，閣佇遮爾幽靜的雪中散步。我想，這種經驗一定會轉化做人生中，一齣美麗閣雪白的無聲電影！

作者：王崇憲

☆詞彙學習☆

【茅野市】Mâu-iá-tshī：位於日本長野縣南信地方的市。其觀光業、工業、農業都較發達。

【搥】ui：以針狀物刺、戳。

【咻】hiu：大聲喊叫。

【手蹄仔】tshiú-tê-á/tshiú-tuê-á：手心。

【軟軟軟】nng-sim-sim：軟綿綿。柔軟而且富有彈性。

【堅凍】kian-tàng：結凍。液體經過冷凍或低溫處理後而形成固體。

【人家厝】jîn-ke-tshù/lîn-ke-tshù：民宅。